

Enviers la fiasta da Pastgas

Brev pastorala pil Sacrament dalla penetienza

da

Msgr. Dr. Vitus Huonder

uestg da Cuera

Frars e soras en Cristus

La cureisma meina nus *enviers la fiasta da Pastgas*. Ella ei in temps da meditaziun e da contemplaziun da nies spindrament, dil pitir e murir da Niessegner Jesus Cristus; era in temps d'oraziun e da legria spirituala. Nus vegnin danovamein pertscharts dalla rihezia da nossa cardientscha ed astgein percorscher la buontad da Diu e sia carezia per nus carstgauns¹. Nus scuvrin, cun risguard all' *emprema lecziun* da quest'emprema dumengia da cureisma, igl artg che Dieus, nies Signur, ha tschentau els nibels suenter il diluvi², per statuir ina ligia cun ils carstgauns. Quei segn dall'affecziun divina vesein nus confirmaus tras il Fegl da Diu, Jesus Cristus. Pertgei el ei s'unius cun nus per adina ella Nova Ligia.

Il segn dalla Nova Ligia ei vegnius imprimius a nus tras il sogn Batten. Quei udin nus ella *secunda lecziun*, cunzun els plaids: Igl ei "il Batten che spendra ussa vus. E quel munta buca mo in lavar naven il tschuf dil tgierp, mobein ei ina supplica tier Diu per ina buna cunscienza tras la levada da Cristus"³. Tras l'aua ed il Spert Sogn essan nus naschi el Batten per ina veta cun Diu. Nus essan vegni integrai en Cristus, emplenì cun la grazia divina, admess ella cuminonza dils sogns e fortificai entras il Sacrament dalla Creisma per dar perdetga da nossa cardientscha. Aschia essan nus habels per ina

¹ Tit 3,4

² Gen 9,13

³ 1 Pd 3,21

eta en sontgadat ed astgein experimentar cul psalmist ch’il Segner ei plein buontad e giustia ⁴.

Era igl *evangeli* meina nus ad ina legria interna ed ina ferma speranza, pertgei el muossa ch’il Segner ha rut la pussonza da Satan e regalau la plenezia dil temps, el qual nus astgein viver cumpleinamein ella grazia. Lein pia mintga di suandar siu clom: “Seconverti e cartei alla buna nova.” ⁵.

Cert, era sco battegiat e cresmai savein nus disdir e curdar enten il puccau. Pertscharts da tala miseria, ha il Segner regalau a nus il Sacrament dalla penetienza. Sco igl evangelist sogn Gion rapporta a nus, ha el, la sera dalla dumengia da Pastgas, dau als apostels la pussonza da relaschar ils puccaus cun ils plaids suandonts: “Retschevei il Spert Sogn. A quels che vus relascheis ils puccaus, ein els relaschai; a quels che vus retenis els, ein els reteni” ⁶. Gie, il Sacrament dalla penetienza ei in sacrament pascal, in sacrament che munta levada e veta cumpleina.

Aschia ei il Sacrament dalla penetienza in *grond agid per nossa veta*. Jeu vi schar valer, che quei ei el temps varagau buca adina vegniu annunziau e capiu en quei senn. Per quei sto quei dun divin, che liberescha e spendra nus, en bia cass vegnir scuvretgs danovamein. Per quei motiv sundel jeu engrazieivels als augsegners ed als gidonters pastorals, sch’els sestentan dad exponer danovamein e cun engaschi la ductrina dalla Baselia pertuccont quei sacrament, sina quei ch’ils fideivels sappien capir adina meglier sia muntada per lur veta ed anflar in niev access ad el.

⁴ Ps 24 (25),8

⁵ Mc 1,23. Sco quei che Jesus ei vegnius tentaus, aschia vegnin era nus mintga di mess all’emprova. Jesus ha victorisau e preceda nus. Cun suandar el e sefidar da ses sacraments, pudein nus untgir la nauschadad da Satan.

⁶ Gn 20,22-23. “Il Segner ha suenter sia levada instituiu quei sacrament, cura ch’el ei cumpariu a ses apostels ed ha detg ad els: ‘Retschevei il Spert Sogn. A quels che vus relascheis ils puccaus, ein els relaschai; a quels che vus retenis els, ein els reteni’ (Gn 20,22-23).” Catechissem dalla Baselia Catolica. Cumpendi, Roma 2005, nr. 298.

Sco mintga sacrament regala era il Sacrament dalla penetienza la *grazia*, il dun da veta surnaturala, da veta divina. Fetg preziosa ei tier quei sacrament la *confessiun persunala* dils agens puccaus. Quella confessiun astg'ins buca mo veser sco cundiziun formala per retscheiver l'absoluziun. Enten confessar nos puccaus, vegnin nus liberai internamein e daventein aviarts per il plaid da perdun da Diu. Igl ei in act essenzial che lai contonscher nus la sanadad da spért ed olma. Cheutras ch'il penitent examinescha profundamein sia cunscienza, s'enricla da ses puccaus, confessa els avon il spiritual, retscheiva l'absoluziun ed ei promts da metter en uorden il malfatg⁷, secumplenescha in process da conversiun spirtala e spirituala, ord la quala nescha veta nova. Aschia vala era cheu il plaid dil Segner: "Tia cardientscha ha spindrau tei"⁸.

La *confessiun persunala* avon il spiritual e l'*absoluziun* ein ligiadas ina cun l'autra e fuorman ina suletta caussa. L'absoluziun generala senza confessiun persunala astga perquei mo vegnir applicada en cass da prighel da mort imminent. Quei vala pia mo en ina situaziun, nua ch'il cartent, ch'ei disponius da prender penetienza, sa buca confessar ses puccaus pervia da specialas cundiziuns externas⁹. Denton, per che l'absoluziun generala seigi valeivla, pretenda era en quei cass la stretgia unitad denter

⁷ Mira Cumpendi nr. 302-303

⁸ Mt 9,22 ed en auters loghens dils evangelis.

⁹ Mira la notificaziun digl empem da schaner 2009 dalla Conferenza Episcopala Svizera "Revisiun dallas normas particularas dalla Conferenza Episcopala Svizera pertuccont il niev dretg ecclesiastic (seria VI). Decret pertuccont can. 961 CIC". Mira era mia brev als spirituals dil december 2007: "La davosa gada ei papa Gion Paul II s'exprimius en caussa el Motu proprio 'Misericordia Dei' dils 7 d' avrel 2002. En sia brev fa el attents nus che mo igl uestg diocesan, e buca il confessur, ha da giudicar schebein in'absoluziun generala seigi giustificada. Considerond sco uestg diocesan las directivas dil CIC, can 961, § 1 e 2, vegnel jeu tier il giudezi che las premissas per in' absoluziun generala ein buca dadas". Persunas che vulan prender penetienza anflan en nossas circumstanzias en temps nizeivel in confessur. Perquei supplicheschel jeu tuts spirituals da semussar sco administraturs fideivels dil Sacrament dalla penetienza e d'agir leusunter tier las devoziuns da penetienza."

confess personal ed absoluziun, ch'il fideivel seconfessi, sche quei daventass pusseivel¹⁰.

Las aschinumnadas *devoziuns da penetienzia* che vegnan recumandadas dalla Baselia han adina lur valeta per gidar ils cartents da perscrutar lur cunscienza, da far ricla e da rugar Diu per perdun. Denton astgan ellas buca vegnir scumbigliadas cun il Sacrament dalla penetienzia. La devoziun da penetienzia ei ina reflexiun ed ina supplica a Diu per contonscher il perdunament. Il sacrament denton, ch'ei colligias cul confess personal dil penitent, ei *en vertit dall'absoluziun dil spiritual* il dun dalla remischun divina e dalla grazia sacramentala.

Frars e soras en Cristus, jeu less encuraschar vus d'acceptar danovamein quei sacrament da speranza, da liberaziun e da legria spirituala¹¹. Jeu sun engrazieivels als spirituals, sch'els stattan vinvavon ed aunc dapli a disposiziun als fideivels per dar penetienzia. Igl ei era indispensabel dad *introducir ils affons cun premura e tenor lur vegliadetgna* el Sacrament dalla penetienzia. Quei vul era dir che l'emprema confessiun preceda l'emprema sontga Communiun. Quei ei in pass impurtont per retscheiver il Segner el Sontgissim Sacrament. Gie, la confessiun ei la megliera preparaziun per la sontga Communiun¹².

Gest el Sacrament dalla penetienzia severifichescha la muntada dil num da "Jesus" che vul dir il "Spindrader". Veramein, Jesus, Niessegner, ei nies Spindrader e Salvader. El surlai nus buc alla pussonza dil Nausch, mobein accumpogna nus *tras l'entira veta* cun quei sacrament. Mintga gada che nus prendein penetienzia,

¹⁰ Quei fuss medemamein stau necessari ella practica dils davos onns, cun quei che las directivas ecclesiasticas han adina puntuau ch'ils puccaus mortals ston vegni confessai, suenter ch'ins ha retschert in'absoluziun generala. Jeu sundel cunscients ch'en biars cass quei ei buca schabegiau. Denton stuein nus supponer, ch'ils fiedeivels han agiu en buna fei, aschia che nus savein plein confidanza surschar il vargau els mauns dalla misericordia divina.

¹¹ Per seprofundar el Sacrament dalla penetienzia eis ei da recumandar il Catechissem dalla Baselia Catolica, Roma 2003, nr.1422-1498.

¹² Mira la brev pastorala da cureisma 2008: Il sontgissim Tgierp dil Segner.

renovescha el en nus la grazia dil Batten e dalla Creisma. Pilver, il Sacrament dalla penitenzia ei in regal che mantegn nus spiritualmein sauns ni medeghescha nus. El muossa a nus che Cristus vul nies spindrament. El ei in ver sacrament pascal che prepara nus per la celebraziun dalla levada da Niessegner e meina nus enviers la fiasta da Pastgas.

Possi *l'intercessiun da Nossadunna*, la quala nus numnein era “refugi dils pucconts” e “gidontra dils cristifideivels” accumpignar nus tras quei temps da penitenzia e contonscher per nus la grazia d'ina veta sontga.

Cun quei giavisch empermettel jeu da far oraziun per vus. Jeu salidel vus dacormein ed admittel mia benedicziun episcopala. Il Segner mantegni vus en sia grazia.

Vies uestg

✠ Vitus